

Mirza Dedić

## Bosnom plivaju sjene

(GOLUB U PADU ILI NAGORJELE DUŠE)

1.

Bakrom mi prelijevaš jutro i okivaš san  
Redova više nema jer ne dolazi vlak  
Čuvam kartu za tebe i meljem zvijezde u prah  
Krenut će valjda jednom neki vagon za nas  
Ovdje je malo tužno, ovdje se umire sad.

2.

Ne znam hoće li podne izdržati na vrelu  
pijesku  
Evo me na stijeni srama  
Umiven i dotjeran kao mlada  
Molitvu razastirem preko morskog žala

3.

I ova svirepo uzburkana tišina  
Lijepa u podatnosti i pohoti  
Iznikla uz pojas od magluštine  
Jalova kao krava koju vode na klanje  
A ljepša nego tvoja košulja  
Šivena u sobama ženskih internata

4.

Sve je u znaku horoskopa  
Rakove ne preporučujem djevicama  
Eskadroni smrti paradiraju ulicama prkosa  
Bez namjere da prikrije tragove  
Raskomadaše i ovo malo mesa  
Eterom kruže ptice, na zemlji leš do leša  
Nisi mi vjerovala  
Ipak  
Cinično ti nude salvetu i escajg  
Ako, neko mladu sprema, u kosi vidim i krv i  
behar.

5.

Živjela je ovdje ta ptica srebrenih krila  
Enver, moj brat po materi mnogo je volio ptice  
Po svu noć su padale kiše  
A njega još uvijek nema, ne čuje se više.

6.

Konvoji, koridori, mrtvi, ranjeni i drugi

Ostalo je još nešto

Njihovo oralno općenje s nakazama, potezi  
perverzni i skupi

I ovaj krstaški pohod na tuđi paradajz

Ciničan je potez razoputrenih udovica pri zalasku  
sunca.

7.

Gledam kako kiša lije bakarnozagasitom bojom,  
Recimo da je to treperenje drvenih perli iza tvojih  
vrata,

Uvlačiš mi se pod pazuhu kao pokisla ptica

Donoseći miris jorgovana i mrvu tuđeg straha,

Ekser pribadam da okačim sliku bojuju  
nijansama rata.

8.

Heterogeno raspeće gospodina u plavom

Reklo bi se da je gore navedena činjenica bez veze

Ali ipak ako postavimo kroz ove stihove i neke  
teze

Sami ćemo doći do saznanja

Na što su nas navodile pjesme

Ipak i nije baš sve tako bez veze

Crkavaju li ovdje ljudi zato što su žege

Ako je tako – čemu onda pjesme.

9.

Tjerali su te da u vreloom ulju pereš noge

Rukama si vagao svoje sopstveno meso

Nisi imao sestre – zato su ti silovali mamu

Ostavljajući tragove na panju

Vidio sam tada goluba u padu

Ostala je poruka u krvi i prahu.

10.

Crvenili li se nebo od plamena pijeska ili krvi

A ko će to znati – arnjevi su truhli

Zaklani su mnogi, brat među prvim

I vidim u prolazu sve mi dragi ljudi

Ne mogu da poznaju nagorjelog u duši.

11.

Ova je curica imala nešto malo godina

Ludo je voljela svoje lutke

Ova je curica silovana

Visak je lomio polje

Ova je curica mrtva – za nju se noćas mole.

12.

Bajrak od mesa što krvari u moru pliša južnijeg masiva  
 Ostavljam u sobi iza tvog klavira  
 Samo da to ne bude kao udar sa neke druge zvijezde  
 Ako nas prepoznaju -  
 Nismo valjda u tolikim govovima  
 Selam materi da ne smijemo odaslati  
 Koliko danas na pijaci srama iznosi kilogram našeg mesa  
 Ima nas - nije da nas nema -  
 Šta da ti više pišem  
 Ako je ovo vrijeme elektronike  
 Majku mu  
 Ako je ovo vrijeme povlaštenih određene boje i rase  
 Crkavaju li moji od gladi zato što opet kasne.

13.

Danas sam rasporio svoj stari kaput  
 Roveći po njemu tražio sam te na dnu džepa  
 Vjerujem još uvijek kako me nisi ostavila  
 A to što te nema  
 Relativno je, kao matematika, kao neka kateta.

14.

Gotovo da zaboravim kako je izgledala ta ptica  
 Raznoseći novine sretih raskomadana prijatelja  
 Ananas u izlogu davno prošla slika  
 Djevojka u prolazu za nekoga pita  
 A osmijeh joj tužan i mekši od pliša  
 Čuvat ću tu sliku negdje na dnu duše  
 A to što trešnje zriju, nema veze  
 Crvenog je ovdje i previše, družo.

15.

Bogu se pomoli, brate  
 Ostali smo sami na kiši  
 Sijena već gore, neko ih pali  
 A valja nam dalje, nema stati  
 Na prašnjavoj cesti leže neki naši  
 Snježi već malo iz kiše  
 Kidiše zima  
 I studen  
 Bjelasalo se jutro preko teške rane  
 Rovili smo krompir i brojali dane  
 Oni su iznemogle bacali u jame

Duboko u sebi mislio sam na te.

16.

Grozdove tuge ovalima služe  
 Ostaje mi jedino još da obojim pticu  
 Rasturit ću ovo malo dobrote na bulevaru strasti  
 Ako, nema veze, molitva će ukrasiti jutro  
 Želim ipak da znaš kako ću umrijeti noćas  
 Dunje mi već pomalo mirišu na tebe  
 Eto ti portreta koji oni žele.

17.

Siguran u svoju smrt  
 A s kartom koja uvijek važi  
 Riješio sam da se tebi javim  
 Ako si za kahvu - navrati  
 Jebiga  
 Eukaliptus je uginuo, ali ne mari  
 Više je ovdje mrtvih nego u kosi vlasi  
 Ovdje je tako, svi umiru mladi.

18.

Zadah smrti davi  
 Avlijom lutaju sjene  
 Vara miris duhana  
 I snove nose do tebe  
 Dobro je  
 Ovdje se ljudi žene  
 Vidim  
 Iz kuća izlaze nene  
 Čilime steru za tebe  
 I kahva se bome melje.

19.

Dobro je imati tebe  
 Ovo je teško vrijeme  
 Bosnom plivaju sjene  
 Okupaj noćas dijete  
 Jaukom, ako krene - idi ne čekaj mene.

20.

Ostalo je nešto malo u piću kad su ih poveli  
 Džins zamijeniše nekim prostim haljinama  
 Asfaltom mile gusjenice  
 Koracima su mjerile ostatak života.

21.

Po svu noć su lile dosadne jesenje kiše  
 Rezbario sam vrata prošlosti

Ostaklit ću tvoj jebeni portret  
 Zašto mi ne priznaš kako nemaš kuda  
 Ostani na ovoj pozornici bluda  
 Republika noćas hoće tvoja muda.

22.

Poravnajmo linije u prostoru  
 Računica jeste jasna  
 Imat ćemo zbir kateta nad hipotenuzom  
 Jednačina ovdje ima alternativu  
 Elem, u poklanim i silovanim leži tajna  
 Da ti kažem kako je sve relativno – reći ćeš da  
 ljudim  
 Ovdje nas dijele na žive i mrtve  
 Računica je prosta – ostaju samo kurve.

23.

Gomila kliče u slavu tvoje ljepote  
 Askeri ne mare, spavaju na perju  
 Centar moći se preselio u tvoju maternicu  
 Koliko će ljudi izginuti tragajući za tobom  
 Ostavljaj ih u nadi duboko skrivena u nama.

24.

Bez namjere da te povrijedim  
 Uvlačim se u tvoju postelju  
 Gotovo da sanjam vrijeme, prostor i ljude  
 Otkaćen u sopstvenim mislima  
 Jurišam na tvoj san  
 Nosim te preko ruke kao lijepi svileni plašt  
 Ostaje za nama plamen, krv i glad.

25.

Centralna predstava je odgođena  
 Elegija me zatiče u tvom krilu  
 Rudari su pozdravljali bez osmijeha na licu  
 Sanjao sam prohu  
 Klasje mi se prividalo blizu  
 A tek kad sam vidio odsječenu sisu...

26.

Haljinom boje lista umorne breze umotavam  
 jutra  
 Avlijom lutaju sjene  
 Našli su juče dijete – pamučnu krpu guta.  
 Pokušaj čovječe analizirati ove slike  
 Izračunaj koliko nas je nestalo juče  
 Jebene li matematike  
 Ekonomija nije stanje uneravnotežene duše

Sisa zakovana na vrata djelo je nečije ruke,  
 A tek kad sam vidio prepečene ljude –  
 Kako je to tužno kad bogovi čute.

27.

Dokono ležim pogleda uprtog u nebo  
 Udovice se univaju na potoku nadošlom od krvi  
 Bosa me djeca prizivaju na večeru  
 Ona je ovdje negdje u gomili pepela  
 Štakori su učinili svoje  
 Napuštam pozornicu odlazeći u prazno gledalište  
 I sjedam na naše staro mjesto  
 Cigani me tječe – odlaze na nebo  
 A mene ne zovu – nisam im ni trebo.

28.

Brata su tjeroali da ljubi njihovo usrano dupe  
 Apsolutna perverzija pomračenog uma  
 Neću ni pokušavati da vas ubijedim u istinitost  
 ovdje upisanog  
 Opširno razlaganje činjenica ne dolazi u obzir  
 Više jednostavno za tako nešto vremena nema  
 Išli smo noseći nemoćne nad jame  
 Čumura su tražili da im tijela pale  
 Išli smo, a znali šta nas čeka dalje.

29.

Lavori puni krvi  
 Umišljam kako to nisu uradili ljudi  
 Kako drugačije objasniti  
 Amputiranje ruke u predjelu šake  
 Vadenje kuršuma djetetu iz jetre  
 Amputiranje pete, šta da ti pričam  
 Čureći – krvare i česme.

30.

Vazali su prešli liniju smrti  
 Imaju još korak pride  
 Tko da zaustavi rijeku  
 Evo je, ona ide – od krvi prokletu lijepa  
 Zalazak sunca nad njom nikakve moći nema.

31.

Bijelog kruha  
 I malo mlijeka u prahu  
 Lagano nosim i spuštam na vagu  
 Erupcijom bola oslobađam lavu  
 Čumur je zapalio moju bivšu zgradu  
 Arnjevi su spremni za krvavu svadbu.

32.

Čuvam sva tvoja pisma  
Evo ih pod jastukom  
Lijepo je spavati na njima. Nego da te pitam  
Imaš li još uvijek volje – jer zna da znaš  
Čilime bosanske da tkaš.

33.

Maslinovog ulja možda ćeš ovdje naći  
Ovamo je nekada bilo svega  
Dobrih ljudi, viskija, leda  
Riba valjanih u brašnu  
I djevojaka  
Čovječe, kakvih je ovdje bilo žena,  
A danas nešto gledam – mnogo čega više od toga  
nema.

34.

Purpurna kiša preko nas je lila  
Aranžirali smo cvijeće pjevajući na japanskom,  
Lijepeći tapete premorenim bojom prošlosti  
Elegično smo pjevušili o majci podlosti.

35.

Veliki bijeli smetovi  
Idilu kvare zbjegovi  
Sjeverom caruju vjetrovi  
Otvaram vrata prošlosti  
Kamen, kremen i rogovi  
Ostajem i tražim boravak da mi se odobri.

36.

Vaše su ceste obrubljene rešetkama  
A zidove koji jedva zadržavaju grijehove  
Razbiše snopovi svjetlosti prezirući mrak.  
Eto zašto svijetle lobanje u poljima gdje niče  
krompir  
Šapatom obojene u plavetnilu noći.

37.

Gledam niz rijeku. dolazi već  
Rana je dobro, mada još peče  
Ako izdržim  
Čekat ću te na istom mjestu  
Ako preživim  
Naći ćeš me na istom mjestu  
I onda ćemo  
Carice moja,

Akobogda niz našu cestu.

38.

Sve je ovdje bivše  
Ruzmarin, kahva i kiše  
Eto ni tebe nema više  
Bakar i halke nižem  
Raskopčan ulicom idem  
Evo nam legija stiže  
Na jasmnin košulje mire  
I nose slatka od riže  
Krijem se da me ne vide.

39.

Gospodo, ginu ljudi  
Lomilo me vrijeme da vam to oćutim  
Ali ne mogu  
Misli su mi postale od valova teže  
Obalu drskosti s njima noćas sijećem  
Čovječe, ne pucaj, bacio sam mreže.

40.

Loše mi vijesti ne daju da spavam  
Oponašam pticu bez namjere da je uvrijedim  
Prejaka doza pilula razorila bi njeno tkivo  
Apsolutna blokada moždanih ćelija  
Rezonujem kako svi pomalo ludimo  
Epicentar navedenog ludila je tu negdje iza naših  
stopala.

41.

Spalio sam svoju zemlju dok sam pticu bojio u  
bijelo  
A ptica je bila snena  
Noseći u sebi krhotine smijeha  
Sanjali smo skupa na santama leda  
Kopali smo jame bez ikakvog reda  
I parče po parče lomili od svega  
Molio sam pticu da mrtve ne gleda  
Ostalo je jutro tamo da nas čeka  
Suzama je svojim orosilo behar  
Tebi je svejedno – još uvijek te nema.

42.

Tužan sam noćas dok pada snijeg  
U krilu žene pahulja mre  
Za ljubav tebi dao bih sve  
Lagano topiš u meni led  
A dah tvoj budi sve moje sne.

43.

Drugačije ovdje ljude jutrom bude  
Uvehnuše snovi kao lanjske ruže  
Veliki nam snovi lagano se ruše  
Neka, nema veze  
Ovakvo je bolje bez krvi i tuge.

44.

Žive li još uvijek one naše lutke u pozorištu  
Eto opet možeš reći kako ludim  
Pizda mu materina – kako podne smrdi  
Čemu ovo sranje, neću više krvi  
Evo, bit ću prvi koji hoće kući.

45.

Trešnje su već odavno prošle  
Evo sam ostavio jednu da ovlažiš usne vrele  
Šapatom te budi jesen  
Ako, sanjao sam sinoć tebe  
Njihala si mrtvo dijete.

46.

Razvaljeno je nebo iznad tvojih vrata  
Umorilo se ljeto od kiše i vlage  
Djevojčica plače – htjela bi da spava  
O nečemu lijepom po svu noć da sanja.

47.

Malo je trebalo pa da ne vidim  
Razvaljenu dinju nasred puta – krvavu do suza  
Koliko li je ostalo još od ovih noći  
Ovo je samo san, ovo mora proći  
Njište li to ždrijepci pred parenje ili je to molitva  
za odbjegle duše  
Imate li nešto recitovat, druže  
Ćilimi su tvoji s one strane duge  
Gluhariš li, prijatelju bivši  
Razoputren u kampu bez nade –  
Ako, nema veze  
Dabogda te stigle suze tvoje majke.

48.

Kasapin iz moje ulice odlazi na vikend  
Oporuka važi  
Za njegovu sestru vele da je luda  
A ona za to ne mari  
Redovno se tuca na pijesku, u vodi, na plaži  
A majka kao majka

Curicu svoju traži.

49.

Plava ptica na njedra ti legla  
Ovo malo jutra ja nikome ne dam  
Čekam,  
I opet čekam  
Tebe u bronzi, u nečemu te čekam, ne znam –  
Evo me plava prijateljice – mada sam samo sjena  
Lješnik ti nosim i trpam u njedra.

50.

Boli me priča o tebi  
Jeste, bio sam tu negdje iza svega iza tebe  
Evo me gdje sam ti noćas svjedok  
Lješnika nema više  
I slatko su raznijeli, ostalo je nešto malo riže  
Nakaze su slavile dok su lile kiše,  
A ti si ih služila bademom od svile.

51.

Štakori uvijek dolaze nenajavljeni  
Izmetom svojim obilježe vrijeme i prostor  
Rasture neke sitnice od porculana  
Okuju jutro svilenim praporcima protkanim od  
tuge  
Krvavo zapjevaše  
I odoše  
Boljelo je  
Rukama sam vagao grozdove od djevojačkih  
crjjeva  
I onako plave, ljeppljive i drage  
Jahačima bijede nudio na rate  
Esme, Jasminke, Ramze i još neke sa spiska bez  
nade  
Gledale su nijemo u grozdove plave.

52.

Modra rijeka je tekla  
I recitovala neku blentavu pjesmu o nama  
Rospije su nudile svoje usluge za šaku brašna  
I jutro je odahnulo trljajući članke pomodrjele od  
okova  
Čovječe, zamisli sa živiš, a oko tebe gusjenice,  
pepeo i mrak.  
I još uz to gomila usranog gvožđa u trbuhu da ti  
spava  
Nećš mi vjerovati - dok sam ti ovo pisao, ona je  
recitovala

A moji pijani drugari onako goli i dragi imenom  
su je zvali.

53.

Lakše mi je dok te gledam tako uramljenu mada  
mi je malo vruće  
Izmorena u pritvoru sopstvene svijesti tvoja  
sestra psuje  
Vrijeme nas pomalo truje  
Neke su gorjele kuće, neka, nema veze  
Ostat će nešto, ostat će nam ovo malo duše.

54.

Čujem te kako se mriještiš u bijelom satenu  
Ako, to je samo bizarno buđenje moje prljave  
mašte  
Jebiga, šta ćeš mi u podsvijesti  
Ne vjerujem ti ja puno računima bez ovjere  
I odjebi od mene u skokovima  
Čekaj me ako hoćeš, možda ću doći ako preživim  
ovo sranje  
Eto toliko od mene i primi to na znanje.

